

譫妄 尸疰

丹溪虛病痰病有似鬼祟論

血氣者身之神也神

既衰乏邪因而入理或有之若夫血氣兩虧痰客中焦妨礙升降不得運用以致十二官各失其職視聽言動皆有虛妄以邪治之其人必死吁哉冤乎誰執其咎憲幙之子傳兄年十七八時暑月因大勞而渴欲飲梅漿又連得大驚三四次妄言妄見病似鬼邪診其脉兩手皆虛弦而帶沉數予曰數爲有熱虛弦是大驚又梅漿之酸鬱於中脘補虛清熱導去痰滯病乃可安遂與人參白朮陳皮茯苓連等藥濃煎

湯入竹瀝薑汁與旬日未効衆皆尤藥之不對予脉
之知其虛之未完與痰之未導也仍與前方入荆瀝
又旬日而安 外弟戚一日醉飽後亂言妄見詢之
係伊亡兄附體言出前事甚的乃叔在邊叱之曰非
邪乃食魚生與酒太過痰所爲耳灌鹽湯一大碗吐
痰一二升汗因大作歷一宵而安 金氏婦壯年暑
月赴筵歸乃姑詢其坐次失序遂赧然自愧因此成
疾言語失倫其中多間一句曰奴奴不是脉大率皆
數而弦予曰此非邪乃病也但與補脾清熱導痰數
日當自安其家不信邀數巫者噴水而呪之旬餘而

死或曰病非邪而以邪治之何遽至於死予曰暑月
赴宴外境蒸熱辛辣適口內境鬱熱而況舊有積痰
加之愧悶其痰與熱何可勝言今乃驚以法尺是驚
其神而血不寧也噴以法水是瀦其體密其膚使汗
不得泄汗不出則蒸熱內燔血不寧則陰消而陽不
能獨立也不死何爲或曰外臺秘要有禁呪一科庸
可廢乎予曰移精變氣乃小術耳可治小病若內有
虛邪當用正大之法自有成式昭然可攷然符水惟
膈上熱病一呷冷涼胃熱得之豈不暫快亦可取安
若內傷而虛與冬令嚴寒符水下咽必冰胃而致害

彼鬱熱在上熱邪在表須以汗解卒得清冷膚腠固密熱何由解必致內攻陰陽離散血氣乖爭去死爲近又何訝焉仲景云邪哭使魂魄不安者血氣少也血氣少者屬於心心氣虛者其人多畏合目欲眠夢遠行則精神離散魂魄妄行陰氣衰者爲顛陽氣衰者爲狂運氣譫妄有二一曰火邪助心經云歲火太過上臨少陰少陽病反譫妄狂越又云火太過曰赫曦其動炎灼妄擾又云少陰所至爲譫妄又云少陰之復振慄譫妄又云少陽之勝心痛煩心善驚譫妄治以鹹寒是也二曰寒邪傷心經云歲水

太過寒氣流行邪害心火病身熱煩心躁悸陰厥上
下中寒譫妄心痛上臨太陽渴而妄冒又云陽明司
天之政四之氣寒雨降振慄譫妄治以甘熱是也

中風或歌哭或笑語無所不至加減續命湯 中惡

卒心腹脹滿吐利不行如乾霍亂狀由人精神不全
心志多恐遂爲邪鬼所擊或附着沉沉默默妄言譫
語誹謗罵詈訐露人事不避譏嫌口中好言未然禍
福及至其時毫髮未失人有起心已知其故登高陟
險如履平地或悲泣呻吟不欲見人如醉如狂其狀
萬端但隨方俗攷驗治之 尸疰等證飛尸者發無

由漸昏然而至其狀心腹刺痛氣息喘急脹滿遁尸者停遁在人肌肉血脉之間觸卽發動亦令人心腹脹滿刺痛喘急攻脇衝心瘥後復發沉尸者發時亦心腹絞痛脹滿喘急雖歇之後猶沉痼在人府藏令人無處不惡風尸者在人四肢循環經絡其狀冷躍去來沉沉默默不知痛處衝風則發伏尸者其病隱伏五藏積年不除未發身體都如無患發則心腹刺痛脹滿喘急又有諸尸症候者則是五尸內之尸症而挾外鬼邪之氣流注身體令人寒熱淋漓或腹痛脹滿喘急或礫塊踊起或攣引腰脊或舉身沉重精

神雜錯恒覺昏謬每節氣改變輒致大惡積年累月
漸至頓滯以至於死死後復易傍人乃至滅門故爲
尸症皆用忍冬藤葉剉數斛煮令濃取汁煎服日三
瘥 太乙神精丹蘇合香丸治此疾第一 因喪驚
憂悲哀煩惱感尸氣成諸證變動不已似冷似熱風
氣觸則發用雄朱散 頃在徽城日常脩合神精丹
一料庚申予家一婦人夢中見二蒼頭一前一後手
中持一物前者云到也未後應云到也擊下爆然有
聲遂魘覺後心一點痛不可忍昏悶一時許予忽憶
神精丹有此一證取三粒令服之少頃已無病矣云

服藥覺痛止神醒今如常矣日後相識稍有邪氣與一二服無不應驗方在千金中治中風之要藥但近世少得曾青磁石爲難合耳

產後譫妄

陳氏云產後狂言譫語乃心血虛也用

朱砂末酒調下龍虎丹參九琥珀地黃丸薛新甫云前證當固胃氣爲主而佐以見證之藥爲善若一於攻痰則誤矣郭氏論產後乍見鬼神者何答曰心主身之血脉因產耗傷血脉心氣虛則敗血得積上干於心心不受觸遂致心中煩躁起卧不安乍見鬼神言語顛倒俗人不識呼爲風邪如此但服調經散

每服加龍膽一捻得睡卽安 產後發熱狂言奔走
脉虛大者四物湯加柴胡不愈加甘艸柴胡生地黃
等分煎服亦可

新嘉大特西時應收果腹不愈賦甘妙契待中

循衣摸牀

循衣撮空摸牀多是大虛之候不問雜病傷寒以大補之劑投之多有得生者東垣云循衣撮空許學士說作肝熱風淫末疾故手爲之循衣撮空此論雖然莫若斷之爲肺熱似爲愈矣其人必譫語妄言經云肺入火爲譫語兼上焦有疾肺必主之手經者上焦也二者皆當其理果如何哉天地互爲體用此肺之體肝之用肝主諸血血者陰物也此靜體何以自動蓋肺主諸氣爲氣所鼓舞故靜得動一者說肝之用一者說肺之體此天地互爲體用二者俱爲當矣

是知肝藏血自寅至申行陽二十五度諸陽用事氣
爲肝所使肺主氣自申至寅行陰二十五度諸陰用
事血爲肺所用 海藏云婦人血風證因大脫血崩
漏或前後失血因而枯燥其熱不除循衣撮空摸牀
閉目不醒揚手擲足搖動不寧錯語失神脉弦浮而
虛內躁熱之極也氣羸鼻乾不潤上下通燥此爲難
治宜生地黃黃連湯主之大承氣湯氣藥也自外而
之內者用之生地黃黃連湯血藥也自內而之外者
用之氣血合病循衣撮空證同自氣而之血血而復
之氣大承氣湯下之自血而之氣氣而復之血地黃

黃連湯主之二者俱不大便

診 病人循衣縫譫語者不可治 病人陰陽俱絕
掣衣撮空妄言者死

循衣摸腹

卷五

三

修荀堂

喜笑不休

喜笑皆屬心火經曰心藏神神有餘則笑不休又云
在藏爲心在聲爲笑在志爲喜又云精氣併於心則
喜又云火太過爲赫曦赫曦之紀其病笑狂妄又云
少陰所至爲喜笑者是也 河間云笑蕃茂鮮淑舒

榮彰顯火之化也故喜爲心火之志也喜極而笑者
猶燔爍太甚而鳴笑之象也故病笑者心火之盛也
一婦病喜笑不休已半年矣衆人皆無術求治於
戴人戴人曰此易治也以滄鹽成塊者二兩餘用火
燒令通赤放冷研細以河水一大碗同煎至三五沸

放溫分三次啜之以釵探於喉中吐出熱痰五升次服降火之劑火主苦黃連解毒是也不數日而笑定矣內經曰神有餘者笑不休也所謂神者心火是也火得風而焰故笑之象也五行之中惟火有笑常治一老男子笑不休口流涎黃連解毒湯加半夏竹葉竹瀝薑汁而笑止矣 刺灸喜笑獨取心主一經經云心主手厥陰之脉是動則病面赤目黃喜笑不休詳盛虛熱寒陷下取之